

आकाशवाणी

खास-खास खबरां

1. प्रधानमंत्री नरेन्द्र मोदी होरें आखेआ जे भारत ते नीदरलैंड वैश्विक संकटें कन्नै निबड़ने लेई भरोसेमंद-पारदर्शी ते भविष्य लेई तयार आपूर्ति बवस्था बनाने पर मिलियै कम्म करा रदे न।
2. प्रधानमंत्री नरेन्द्र मोदी होर कल अपने पंज मुखें दे दौरे दे त्रीए चरण च स्वीडन दा दौरा लागंन।
3. भारतीय सेना दे चीफ जनरल उपेन्द्र द्विवेदी होरें पाकिस्तान गी आतंकवादियें गी पनाह देने ते भारत खलाफ कार्रवाई करने लेई चेतावनी दिती ऐ।
4. CBI ने NEET –UG 2026 दे Paper Leak मामले च Biology दे Paper Leak कन्नै जुड़े दे इक Master Mind गी गिरफ्तार कीता ऐ।
5. पच्छिम बंगाल सरकार नै 2011 थमां जारी जाति प्रमाण पत्रें दी Re-verification दा हुक्म दिता ऐ।
6. बैडमिंटन च भारती जोड़ी सात्विक साईराज ते चिराग शेटी ने थाईलैंड ओपन च सैमिफाइनल च Malaysian जोड़ी गी हराइयै फाइनल च प्रवेश कीता ऐ।

<><><><><><>

PM Community Event- Netherland

प्रधानमंत्री नरेन्द्र मोदी होरें अज्ज आखेआ जे भारत ते नीदरलैंड वैश्विक संकटें थमां निबड़ने लेई भरोसेमंद पारदर्शी ते भविष्य लेई तयार आपूर्ति बवस्था बनाने पर मिलियै कम्म करा'रदे न। अपने पंज मुखें दे दौरे तैहत अज्ज नीदरलैंड दे हेग च इक समुदायक कार्यक्रम गी सम्बोधत करदे होई उ'नें आखेआ जे दुनिया इस समें कोविड महामारी- जारी संघर्षे ते ऊर्जा संकट जनेही केई चुनौतियें दा सामना करा'रदी ऐ। उ'नें आखेआ जेकर इनें चुनौतियें दा तौले हल नेही कीता गेआ- तां वैश्विक विकास प्रभाव होई सकदा ऐ ते इक बड़ी आबादी गरीबी आहली बक्खी जाई सकदी ऐ। आर्थिक स्थिति गी मजबूत करने दे वैश्विक जतनें गी उजागर करदे होई प्रधानमंत्री होरें आखेआ जे भारत ते नीदरलैंड सांझे तौरा पर कम्म करा रदे न। प्रधानमंत्री होरें आखेआ जे 21मीं सदी च भारत अवसरें दी धरती बनियै उभरा करदा ऐ- जेहड़ा तकनीक ते मानवीय मूल्यें दौनें दे आधार पर अगे बधा रदा ऐ।

<><><><><><>

PM -Sweden

नीदरलैंड दी अपनी यात्रा दे खत्म होने मगरा प्रधानमंत्री नरेन्द्र मोदी होर कल अपने पंजे मुखें दे दौरे दे त्रीए चरण च स्वीडन दा दौरा लागंन। दबक्खी बपार- रिकार्ड उच्चतम स्तर पर पुज्जने कन्नै स्वीडन दे औद्योगिक दिग्गज न शड़ा बजार दा निरिक्षण नैई करा'रदे सगुआं इनें बजारें कन्नै जुड़ियै बड़ा मता कारोबार होर बधाऽ करदे न। प्रधानमंत्री मोदी होर स्वीडन दे अपने दौरे दुरान स्वीडन दे प्रधानमंत्री क्रिस्टरसन हुंदे कन्नै दबक्खी गल्लबात करगंन- तां जे दबक्खी रिश्ते गी होर मजबूत कीता जाई सकै ते दबक्खी बपार गी बधाने दे कन्नै Green transition – AI उभरदी तकनीकें स्टार्ट-अप- Defence- Space जलवायु ते लोकें कन्नै लोकें दे सरबंधें गी बधाने लेई सहयोग दे नमें रस्ते तुप्पगन। दौनें प्रधानमंत्री European Commissions दियां President H.E. ME. Ms Ursula Von der Leyen हुंदे कन्नै इक प्रमुख Pan European Business Leaders Forum गी सम्बोधत करगंन।

<><><><><><>

PM Iraq Congratulations

प्रधानमंत्री नरेन्द्र मोदी होरें अली फालीह काधीम अल ज़ैदी होरें'गी इराक दे प्रधानमंत्री दे तौरा पर पदभार संभालने पर बधाई दिती ऐ। अपने इक सोशल मीडिया पोस्ट च मोदी होरें आखेआ जे भारत इराक कन्नै अपने लम्मे ते दोस्ताना रिश्ते गी मता महत्व दिंदा ऐ ते सम्भनें क्षेत्रें च दबक्खी रिश्ते गी होर मता मजबूत करने लेई प्रतिबद्ध ऐ। प्रधानमंत्री होरें आखेआ जे ओ दौनें मुखे दी सांझी तरक्की ते समृद्धि लेई रलियै कम्म करने दी मेद करा'रदे न।

<><><><><><>

Trumpn- Taiwan

अमरीकी राष्ट्रपति डोनाल्ड ट्रम्प होरें तेईवान गी चेतावनी दिती ऐ जे ओ चीन थमां औपचारिक तौरा पर आजादी दी घोषणा नेंई करै। तेईवान दे राष्ट्रपति Lai-Ching-Te होरें इस थमां पैहले बी आखेआ हा जे ताईवान गी आजीद दी घोषणा दी लोड नेंई ऐ-कीजे ओह पैहले गै अपने आप गी संप्रभु राष्ट्र मनदा ऐ।

<><><><><><>

Army Chief –Sena Samwad

भारतीय सेना दे चीफ जनरल उपेन्द्र द्विवेदी होरें अज्ज आखेआ ऐ जेकर पाकिस्तान आतंकवादियें गी पनाह दिंदा रौहग ते भारत खलाफ कारवाई करदा रौहग- तां उसी फैसला करना होग जे ओ भूगोल दा हिस्सा चाहंदा ऐ जां इतिहास बनना चाहंदा ऐ। नमीं दिल्ली च इक कार्यक्रम “सेना संवाद” च जनरल द्विवेदी हुंदी एह टिप्पणी देश ते भारतीय फौज आसेया ऑप्रेशन सिंदूर दे इक बरे पूरे होने मगरा आई ऐ ते भारती एजेंसियें ऑप्रेशन regepill दे जरिये 182 करोड़ रुपें दी Captaagon Drug जब्त कीती ऐ। सोशल मीडिया पोस्ट च गृहरमंत्री अमित शाह होरें इस जानकारी गी सांझा करदे होई आखेआ ऐ जे भारत सरकार नशा मुक्त भारत लेई वचनेबज्जी दी ऐ।

<><><><><><>

CBI – NEET Arrest

सी.बी.आई नै अज्ज NEET –UG 2026 दे Paper Leak मामले च Biology दे Paper Leak कन्नै जुड़े दे इक मास्टरमाईंड गी गिरफ्तार करी लैता ऐ। मनीशा गुरुनाथ मंधारे नांs दा आरोपी- महाराष्ट्र दे पुणे दा रौहने आला ऐ ते वरिष्ठ Botany टीचर ऐ। सी.बी.आई नै आखेआ ऐ जे ओह NEET –UG 2026 दे मतेहान प्रक्रिया च शामिल हा ते NTA आसेया उनें गी Expert दे तौरा पर नियुक्त कीता गेआ हा।

<><><><><><>

Baramulla Searches

जम्मू-कश्मीर पुलसै बंदश आले संगठन जमात-ए-इस्लामी खलाफ गैर-कनूनी गतिविधिएं दी रोकथाम सरबंधी कनून-UAPA तैहत दर्ज इक मामले दे सरबंधै च अज्ज बरामूला जिले च केंई थाहरें पर छापे मारे न। सोशल मीडिया दी इक पोस्ट च सोपोर पुलसै दस्सेया जे इनें छापें दुरान इस गुट कन्नै जुड़े दे साहित्य सनें किश ऐतराज-जोग समेयान बी बरामद कीता गेआ ऐ। तोंआई इक होर गेंह दे तैहत सोपोर पुलसै पाकिस्तान थमां गतिविधियां चला'रदे हिज्बुल मुजाहिदीन आतंकी नेटवर्क कन्नै जुड़े दे इक भगौड़े आतंकवादी दी अचल सम्पत्ति गी कल अटैच करी दिता। एह आतंकी थेहारें दी सिखलाई लैने लेई बन्ना टप्पियै पाकिस्तान बक्खी चली गेआ हा ते केंइयें बरे शा कनूनी कार्रवाई शा बचदा आवा रदा ऐ।

<><><><><><>

Self Enumeration

बरे 2027 आली मरदमशुमारी लेई आंपू डिजिटल तरीके राहें अपनी गिनतरी दर्ज करोआने दी प्रक्रिया कल्लै थमां जम्मू-कश्मीर च शुरू होआ रदी ऐ। मकामी बसनीक कल बडुलै थमां चालू होआ रदे मरदमशुमारी आले अधिकारिक पोर्टल राहें ऑनलाईन ढंगै नै अपनी गिनतरी दर्ज करोआई सकदे न। एह सुविधा औंदी 31 मई तोड़ी उपलब्ध रौहग ते लोक- घर बैठे दे गै अपने परोआरिक ब्यौरे ऑनलाईन दर्ज कराई सकदे न। सरबंधत अधिकारियें लोकें गी अपील कीती ऐ जे ओह पूरी सक्रियता कन्नै इस प्रक्रिया च शामिल होन ते स्टीक जानकारी दर्ज करना जकीनी बनान। डिजिटल चरण दे मगरा पैहली थमां 30 जून 2026 तोड़ी माहिर इन्युमिरेटरें आसेआ घरें गी सूचिबद्ध करने दी प्रक्रिया गी तोड़ चाड़ेया जाहगा।

<><><><><><>

WB-Resverification

पच्छिम बंगाल सरकार नै 2011 थमां जारी कीते गेदे सबभतें जाति प्रमाण पत्रें दी दबारा Reverification करने दा हुक्म दिता ऐ। अधिकारियें दा आखना ऐ जे पिच्छले 14एं बरें थमां इनें दस्तावेजें दी प्रामाणिकता ते वैधता बारे सवाल खड़े कीते गेन। सरकारी रिकार्ड मुजब दस्सी गेदी अवधि दुरान अनुसूचत जाति- अनुसूचत जनजाति ते होर पिच्छड़े वर्गें लेई तकरीबन इक करोड़ 69 लक्ख जाति प्रमाण पत्र जारी कीते गे न।

<><><><><><>

WB-Reservation

पच्छिम बंगाल च भारती जनता पार्टी दी नमीं बनी दी सरकार ने होरनें पच्छड़े तबके यानि OBC आरक्षण कन्नै सरबंधत सर्वोच्च अदालत च चला करदे मामले गी वापस लैने दी प्रक्रिया शुरु करी दिती ऐ- जंदे वीरवारें सरकारी वकील कुणाल मिमानी होरें सर्वोच्च अदालत दे रजिस्ट्रार होरें'गी चिट्ठी लिक्खियै मामले गी वापस लैने लेई फौरी सुनवाई दी गुजारश कीती। कलकत्ता हाई कोर्ट नै मई 2024 गी तृणमूल कांग्रेस दी सरकार आसेया तयार कीती गेदी OBC सूची गी रद्द करियै नमीं सूचि बनाने दा हुक्म रसाल कीता हा। तंदु आली तृणमूल सरकार नै इस फैसले गी लेइयै सुप्रीम कोर्ट च अपील कीती ही। मुख् न्यायधीश सूर्यकांत हुंदी पीठ इस मामले दी सुनवाई करा रदी ऐ।

<><><><><><>

Weather

भारतीय मौसम विभाग ने अगले दौं दिनें दरान अंडमान ते निकोबार द्वीपें- पच्छिम बंगाल- सिक्किम- असाम- मेघालय ते दक्खनी अंदरुनी कर्नाटक च भारी बरखा दी पेशनगोई कीती ऐ। मौसम विभाग दे मताबक कल अरुणाचल प्रदेश- केरल- माहे-तमिलनाडू-पुद्दुचेरी ते कराईकल च बी इसै चाल्ली दी भारी बरखा दी मेद बुजझी ऐ।

<><><><><><>

IPL

IPL क्रिकेट च कोलकाता नाईट राइडर्स दा मकाबला अज्ज संजा गुजरात टाईटन्स कन्नै होग। एह मैच ऐतिहासिक ईडन गार्डन च खेड्डेया जाहग। मैच संजा साड्डे सत बजे शुरु होग।

<><><><><><>

Chess

भारती ग्रैंडमास्टर आर.प्रग्नानंदा होरें बुखारेस्ट च आयोजित सुपरबेट शतरंज क्लासिक रोमानिया-2026 दे दुए दौर च उज्जेक खड्डारी जावोखिर सिंदारोव गी हराइयै अपनी पैहली जित्त दर्ज कीती। प्रग्नानंद होरे काले मोहरे कन्नै खेड्डे होई उज्जेकिस्तान दे विश्व चैम्पियनशिप- चैलेंजर सिंदारोव गी हराया। पैहले दौर च अलीरेज़ा फ़िरोज़जा दे कन्नै प्रग्नानंदा दा मुकाबाल ड्रा रेहा। प्रग्नानंदा दे 2 राउंड दे बाद डेढ़ अंक न।

<><><><><><>

Satish Tanga Ride

किफायती यात्रा गी बढ़ावा देने दी इक अनूठी मिसाल कायम करदे होई ट्रांसपोर्ट मंत्री सतीश शर्मा होरें अज्ज श्रीनगर च टांगे पर सफर कीता ते प्रधानमंत्री हुंदी ऊर्जा सरबंधी चिंताएं दे चलदे बचत ते ईंधन दे संरक्षण दे आह्वान पर प्रतिक्रिया दिती। उ'नें नागरिकें गी ईंधन दी खपत गी घट्ट करने लेई पर्यावरण दे अनुकूल विकल्प अपनाने लेई बी प्रोत्साहित कीता। इस पैहलकदमी बारे बोलदे होई मंत्री होरें आखेआ जे टांगा विरासत ते स्थिरता गी बढ़ावा देने दे कन्नो-कन्नी मोटर गड्डियें दा इक व्यवहारिक विकल्प बी उपलब्ध करोआंदा ऐ। उ'नें वैश्विक स्तर पर ऊर्जा सरबंधी बधदी चिंताएं दे चलदे टांगे गी परतिऐ जीवत करने ते इलेक्ट्रिक गड्डियें दे विकल्पें गी अपनाने दी बी वकालत कीती। इक जिम्मेवार जीवन जीने दी दिशा दे रुप च इस गेंड दी व्यापक सराहना कीती जा'रदी ऐ।

<><><><><><>

Rajouri Hospitalized

राजौरी दे कोटरंका सब-डिवीजन च जंगली सब्जी खाने दे मगरा संदिग्ध फूड प्वाइजनिंग दे चलदे इक आदमी दी मौत होई गई ऐ ते किश बच्चें सने 7 होर लोकें गी अस्पताल च भर्ती करोआया गेआ ऐ। साढे जिला संवाददाता ने जानकारी दिती ऐ जे इस घटना च मोहरा ग्रां दे दंडू परोआरें दे सदस्यें दी तबियत बिगडी गई ही। इनें शुक्रवारें दपैहरी एह सब्जी खादी ही। संजा'लै तगर सब्भनें 8 लोकें च इस बमारी दे लक्षण दिक्खने गी लब्बे ते उनें'गी पैहले सामुदायिक सेहत केन्द्र- कंडी च भर्ती करोआया गेआ ते फही उनें'गी सरकारी मैडिकल कालेज राजौरी रेफर कीता गेआ। 58एं बरें दे इक आदमी मोहम्मद हुसैन दी इलाज दौरान मौत होई गई -जिसले के होरनें दी मैडिकल दिक्खभाल चला रदी ऐ। अधिकारियें मामले दी जांच शुरु करी दिती ऐ।

<><><><><><>

CM Water Management

मुख्यमंत्री उमर अब्दुल्ला होंरें केन्द्र शासत प्रदेश च गंदे पानी सरबंधी चुनौतियें कन्नै निब्वडने ते साफ-सफाई आले ढांचे गी तगड़ा बनाने लेई राजौरी ते बारामूला जिलें आस्तै इस्तेमाल कीते गेदे पानी दे प्रबंधन आली योजनाएं गी मंजूरी दिती ऐ। मुख्यमंत्री हुंदे दफ्तरै मूजब- राजौरी आली परियोजना पर 34 करोड़ 43 लक्ख रपे जिसले के बारामूला परियोजना पर 37 करोड़ 96 लक्ख रपे खर्च कीते जाडन। इनें प्रोजैक्टें दा मकसद गंदे पानी गी साईसी ढंगै नै साफ करना- जल स्रोतें गी प्रदूषित होने शा बचाना ते इनें इलाकें च सार्वजनिक सेहत- साफ सफाई ते जीन जीने दे हालात च बेहतरी आहन्ना ऐ।

<><><><><><>

Rly Bridge Restored

8एं महीने दे लम्मे इंतजार दे बाद आखरकार हुन जम्मू ते पठानकोट बश्कार रेल दी आओ-जाई बिजन कुसै रुकावट दे फही शुरु होई जाहगा। कीजे रेलवे ने रावी दरेया आले पुल नम्बर -17 दी मरम्मती दा कम्म रिकार्ड समें अंदर सबूरा करी लैता ऐ। रेलवे ने दावा कीता ऐ जे एहदे नै हुन खित्ते च सब्भै बड्डे पुल पूरी चाल्ली चालू होई गे न। इस गैह कन्नै जम्मू खित्ते च रेल सम्पर्क ते समें दी पाबंदी च बडा मता सुधार होने दी मेद ऐ। ध्यानजोग ऐ जे पिच्छले बरे रावी दरेया च जबरदस्त हाड औने करी 26 अगस्त 2025 दी रातीं रावी दरेया पर पुल नम्बर 17 दे इक थम्म गी नुक्सान पुज्जा हा -जिस करी लखनपुर ते माधोपुर बश्कार रेल ट्रैक गी अद्दे-दुब्बे तौर पर बंद करी दिता गेआ हा।

<><><><><><>

Thailand Open- Badminton

थाईलैंड ओपन बैडमिंटन च अज्ज बैंकाक च सैमीफाईनल च भारती जोड़ी Satwik Sairaj- Rainki Reddy ते चिराग शेटी होंरें मलेशिया दे Goh Sze Fei ते नूर इज्जुद्दीन गी हराइयै फाइल च प्रवेश करी लैता ऐ। भारती जोड़ी नै 82 मिन्टे दे मैच च 19-21/22-20/21-16 कन्नै जित्त हासल कीती। फाईनल च भारतीय जोड़ी दा मकाबला जां ते इंडोनेशिया जोड़ी कन्नै होग जां ते चीनी जोड़ी कन्नै होग।

<><><><><><>